

Buna sira! Buna sira, me cari siuri!

Anche ist'ani fonda di toc ad strà cun calma e tranquillità, di'ater cun el fià gros e el cor an buca, ben o ma, a suma rivà au Nadal del 1977, e c'me c'la vò la tradision a suma turna chi a dei in gir per la 53<sup>a</sup> vota a sta Divota Cumedìa, cun in ani an pù an su reinon.

53 ani ad fila - fè semper la medesima rapresentasion - forse a l'è fin trop, forse a l'è ina esagerasion; ma dato che ades el va d'moda l'anti-quariato, i caudren d'aram dna vota, el robi vegi, l'è per su lei ca cuntinuum a fè Gelindu, c'l'è na roba facia an cà, genuina, na roba natural d'na vota, senza coloranti, senza additivi chimici. Pò, si sei nent stuf vuiater d'avnimi a vighi, noi um smeia monc veira ad pudei fè i ciulandari e i uataròn an suma dis palc.

Eh! La me cara gent, forse el capitarrà che el 1977 na votaambutiglià, pasà cuc ani, lasondji avni an po' ad fiurèta ansuma, um smejerrà pu bel, ades però, el 1977 parlondni da viv, a l'è stacc in ani cu n'a cumbinà ad tücc i culur; u iè nent stacc gli olimpiadi, epura u 77 l'à batì tücc i record di pastis.

A juma facc u record dla gratareina: s'anduma avonti acsei, fra minister e parlamentari ampegnà an ti pruces, a la Camera u jarmàn pü an-sèn, us po' fè in giò da buci.

El bel a l'è che sti siuri chim cmondu, i continuu a predichè cu j'è la crisi del Mezzogiorno; me um smeia cui seia anche la crisi d'la culasiòn e d'la seina; cun tücc i sold chj'on fundì an tel Mezzogiorno i pudivu instrialisè anche u deserto du Sahara.

Im predicu che i stipendi e el pension i son trop out, e lur per dè el bon esempi (tücc d'acordi) is son aumentà ad 160 mila al meis!

U j'è la crisi dla scola, u j'è sa acsì poca gent c'l'a studia, chi son sbarcà anche gl'Indiani metropolitanì a fè del 48; i son cuilà ch'jon el piümi ad galeina da drera, e u rusèt, anveci da bitesli an sel lavri, i sla bütu an sel ganasi.

I son tücc antiligent da mat! guai al mond se in prufesur u na bucia jèn; in prufesur ch'el bucia u dev presentes a scola, accompagnato dall'onorevole Malfatti. Certo che con la manconsa d'auli cu j'è, fighirumsì su j'è el post per i ripetent.

Eh! ades i son tücc an gomba e anteligent, perchè uardanda semper carosello, j'amparu l'alimentasion giusta, cula cla svilüpa la cunision. Mei a j'ò capì ades perchè a ciapava semper di gron 4 a scola; la culpa a l'era ad tuta cula pasta e fasò e ris e cisi ch'im favu mangè.

Certo che el mond a l'è cambià, a suma entrà an tla civiltà dei consumi; sa da quondi chi venu al mond el masnà i son pü liberi, noi im fasavu tücc cme del mumii, e piasà acsei, dindunondmi per fem drumì, el noster mami, ch'javu semper na presia d'asident, im favu bati la culumbarda contra la chëina da chì e da là. A l'è per su lei che noi, gent d'na vota, a juma la testa grosa cmè in armari; ades invece i giuvu j'on di testen fen, gros d'acsei.

Ades a in ani i crompu el vasino carrozzato Zagato, a 5 ani i mondu a la scöla ad sci a Cortina, a scöla di nuoto, a 10 ani i von a Londra a amparè l'ingleis, e us capis, rivà a 18 ani, per divertirsi i peiu a cous an tel cü so pari.

Per forza che i giuvu, cun tüt cul ch'jon, i cuntestu la civiltà dei consumi, noi a pudivu nent, perchè da cunsümè a iavu poc o gnente.

La gent, us capis, pitost che andè an t'na valle di lacrime, la preferis andè an t'la Val D'Austa.

Ades però, vist che andanda avonti acsei, andavu a finì a carti 48, j'on pensà ben ad fem andè an poc pü adasi, i mon dac la rasa; l'è per su lei ch'jon bità u limite ad velocità, j'on gavà el festi infrasettimanali; acsei a travaiuma pü tont e cunsümuma an po' menu bensina.

Per gavè el festi però u j'è stacc del discussion chi finivu pü:

“Se t'am dai el 4 nuvember, at dag el Corpus Domini, per el 1° Maggio a voi la festa ad S. Giusep”; e S. Giusep, an paradis, la piantà la groina cun so fiò, perchè l'à permeti is declassament. Certo che si gavu la Befana, chi ch'el porta veia tutti gl'iater festi? Ma stè püra tranquil che Lama e Andreotti i mna portu veia, pü ad cul cla facc fina ades la Befana!

A proposit, u smeia chiabu unificà la festa dla Befana, con la festa internazionale della Donna. Adele Faccio però l'era nent d'acordi.

Certo che Lama, i sei cul ca l'à semper la pipa an buca, a l'è an gomba dabon: con la scüsa del compromesso storico, oltre a a tücc i sindacati cu iè, lè riuscì fina a fè u sindacato di Previ e di Frà; e vighi non vighi, i son entrà an agitation anche lur!

I voru la settimana santa-corta e l'indennità per la cuntinensa, i pù scaudà, i previ ultra, i minaciu u dirutament dla prucision e u lancio delle ampolline Molotov.

A pruposit ad cuntestasion, ad bottiglie Molotov, ad P.38, us sa pù cme fè andè an gir; se ièn l'ha nent la pusibilità ad fè rivè da l'Africa in para ad gorilla ch'il cumpagnu per el strà, u j'è el pericul che a drera cuc canton iv fasu la festa.

Acsei la gent, an pò per la paura, an pò perchè ad sold da spendi ui na j'è semper pù pochi, us racia an ca, us bita an pantufli, e la pasa u so tempo libero, davonti a la television.

Cun tuti is television liberi cu j'è, ogni canal a l'ha in prugrama. Ui monca ancora el vegg canal d'Bursalen che, töncc ani fà, el pasava an tla Pista, e po' i son tücc.

An ca, us capis, ui dà fora del gron rusji; gnaca el prim canal, cu j'è u telegiornale, u dis el pari, la mari: gnaca u sgond, cu j'è in bel film. No! per la carità sta sira a T.V. Alessandria, u j'è cula facia da stupid del me amis chel conta.

I film i son bei dabon; però, s'ion nent 30 ani d'invicchiamento, i mjà fon nent vighi.

A la duminica po', us taca a 2 bot e mes cul nutisii spurtivi, e fina a 11 uri ad nocc cun la Domenica Sportiva, jèn us bugia pù davonti a la television; anduma a drumì stonc cme bestii per esi stac setà tut u dì, e cun in gron mà a la scheina.

Con tuta sa reclam ch'im fon vighi, el masnà ades la prüma parola chi disu, le nent: Mama-Papa, ma Di-Dixan, Pa-Palmolive.

I fon la reclam propi a tüt: la pasta Combattenti - mangèla cun la baiu-nètta; la festa dei fidanzati, la festa del papà, la festa d'la mama, la festa del murus dla mama; ui monca ammac pù chi fasu la reclam a l'olio santo.

Acsei anche la radio vaticana, per esi agiurnaia ai tempi moderni, u sè bitaia anche lè a fè la reclam, an Laten però: "Premium Nabisco-Motta pro nobis, Pino Silvester - venite ad oremus".

Eh! Dapertüt absogna agiurnesi, dapertüt absogna esi al pas cun i temp. El presepi, per esempi, us fa pù cme na vota, al post del bô e d'l'asu, us buta in cundisiunatur d'aria couda, al post ad noi pastur, us buta 2 pullman; jèn del TG1 ch'el fà l'intervista a la Madona, l'ater del TG2 ch'el

fà l'intervista a S. Giusep però, ammac cme rappresenton du sindacato di meisdabosch.

Eh! La me cara gent, a l'è propi per esi agiurnà, per esi semper al passo con i tempi che el robì i von acsi ben! El mond a l'à nent capì, o l'à nent ausì capì, cul che u Siur Messia lè avni a purtè an s'la tera 2000 ani fa. "Pas an tera a tuc i'omi ad d'boina voluntà".

Pas an tera el vô di ad iutes ion con l'ater, el vô di ad dei na mon a chi cu n'ha damsogn, sincerament, unestament, senza pretendi niente.

Omi ad boina voluntà i son cuilà che senza fè del rivolution, senza masè ansèn, senza mandè an manicomio d'la gent chi son pü savì che lur, i riesu a migliurè con l'unestà e u travai, la sô cundision, la cundision d'la sô Nasion.

Pensuma semper ai mutiv che u Siur Messia le avni an sla tera: per fem pü unest, pü giust, pü omi.

Ades a piont lei se no i disi: per senti na predica, andava an Cesa, im l'a favu pü bela e a pagava propi gnent du tüt. Ades av present la famija...

